



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400
fax. +387 33 726 423
e-mail: info@voda.ba

Broj: **UP-1/21-3-40-068-7/24**
Datum: **12.06.2024. god**

«Agencija za vodno područje rijeke Save» Sarajevo rješavajući po zahtjevu pravnog lica Tvornica šibica «DOLAC» d.o.o. Travnik za donošenje rješenja o vodnoj dozvoli za ispuštanje tehnoloških otpadnih voda sa lokaliteta pogona za proizvodnju šibica izgrađenog u naselju Dolac na Lašvi, općina Travnik na osnovu člana 109. stav (1) tačka 2. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98, 48/99 i 61/22), donosi

RJEŠENJE **o vodnoj dozvoli**

1. Daje se vodna dozvola pravnom licu, Tvornica šibica «DOLAC» d.o.o. Travnik, za ispuštanje tehnoloških otpadnih voda sa lokaliteta pogona za proizvodnju šibica izgrađenog u naselju Dolac na Lašvi, na zemljištu označenom kao k.č. broj: 3169 K.O. Travnik, općina Travnik.
2. Ova vodna dozvola ne oslobađa podnosioca zahtjeva obaveze pribavljanja vodne dozvole za ispuštanje sanitarno fekalnih voda za čije izdavanje je nadležno Ministarstvo poljoprivrede, vodoprivrede i šumarstva Srednjobosanskog kantona u skladu sa članom 139. stav (2) tačka 2. Zakona o vodama ili općina, ukoliko je kantonalnim propisom prenesena nadležnost na općinu, shodno stavu (3) istog člana Zakona.
3. Vodna dozvola se daje na osnovu dostavljene dokumentacije, utvrđenog činjeničnog stanja, dostavljenog detaljnog dinamičkog plana i uz sljedeće uslove:
 - 3.1. Da se upotreba i korištenje predmetnog objekta Tvornice šibica u naselju Dolac na Lašvi, općina Travnik vrši u skladu sa njegovom prirodom i namjenom te u skladu sa dostavljenom dokumentacijom i uslovima iz ove vodne dozvole.
 - 3.2. Da se, u skladu sa dostavljenim dinamičkim planom, ovjerenim i potpisanim od strane odgovornog lica podnosioca zahtjeva, a koji je sastavni dio ovog Rješenja, do 30.06.2026. godine završe radovi na prikupljanju i tretmanu tehnoloških i ostalih otpadnih voda te ispuštanju prečišćenih voda u rijeku Lašvu sa lokaliteta Tvornice šibica u naselju Dolac na Lašvi, općina Travnik, a sve prema investiciono-tehničkoj dokumentaciji urađenoj od strane «ZAGREBINSPEKT» d.o.o. Mostar, juli 2018. godine.
 - 3.3. Da se u periodu do 31.07.2024. godine završi postupak prikupljanje i evaluacija pristiglih ponuda te konačan odabir i potpisivanje ugovora sa najpovoljnijim izvođačem radova.
 - 3.4. Da se u periodu od 01.08. do 30.11.2024. godine završe aktivnosti na trasiranju kanala za polaganje instalacija vodovoda i kanalizacije i utvrđivanju tačnog položaja, dubina i profila postojećih instalacija vodovoda, kanalizacije i ostalih instalacija.
 - 3.5. Da se u periodu od 01.12. do 31.12.2024. godine završi aktivnosti na uklanjanju postojećih kada za pranje u prostoru kuhinje za masu u kojoj se vrši pranje posuda i opreme.
 - 3.6. Da se u periodu od 01.01. do 30.06.2025. godine završe zemljani radovi na predmetnom lokalitetu (iskop rovova za polaganje cjevovoda, razastiranje šljunka...)
 - 3.7. Da se u periodu od 01.07. do 30.09.2025. godine izvrši nabavka, transport i ugradnja novih kada u prostoru kuhinje za masu i prostoru za proizvodnju šibica u kojima će se vršiti pranje posuda i opreme toplom vodom.
 - 3.8. Da se u periodu od 01.10. do 31.10.2025. godine izvrši nabavka, transport i ugradnja IBC kontejnera (2 kom) kapaciteta 1000 (l) za prihvatanje tehnoloških otpadnih voda.
 - 3.9. Da se u periodu od 01.11. do 31.12.2025. godine izvrši nabavka, transport i ugradnja samousisne centrifugalne jet pumpe (2 kom) pomoću kojih će se tehnološke otpadne vode ispuštati u IBC kontejnere.
 - 3.10. Da se u periodu do 01.01. do 28.02.2026. godine završe aktivnosti na blindiranju postojećih ispusta tehnoloških otpadnih voda u rijeku Lašvu.

- 3.11. Da se u periodu od 01.03. do 30.04.2026. godine završe aktivnosti nabavke, transporta i ugradnje separatora ulja i masti sa koalescentnim filterom.
- 3.12. Da se u periodu od 01.05. do 30.06.2026. godine završe aktivnosti nabavke, transporta i ugradnje PVC kanalizacionih cijevi za prihvata oborinskih onečišćenih voda sa manipulativnih površina.
- 3.13. U toku izvođenja radova na predmetnom lokalitetu neophodno je osigurati stručni nadzor nad izvođenjem istih te poduzeti sve potrebne mjere zaštite da predmetnim aktivnostima ne dođe do nastanka štete ili nepovoljnih posljedica po vode i vodni režim kao i postojeće korisnike voda.
- 3.14. Materijal iskopan u toku izvođenja radova na izgradnji novog sistema za prikupljanje, odvodnju i tretman otpadnih voda se ne smije ni privremeno odlagati na česticu «vodno dobro», odnosno u rijeku Lašvu i na njene obale.
- 3.15. Način instaliranja separatora ulja i masti te stavljanje istog u funkciju uskladiti sa proizvođačem opreme u svim fazama.
- 3.16. Čišćenje i pražnjenje separatora ulja kao i pražnjenje IBC kontejnera za akumuliranje tehnoloških otpadnih voda nastalih u postupku spravljanja šibica može vršiti isključivo firma ovlaštena za tu vrstu djelatnosti, prema posebnom ugovoru. Korisnik je obavezan da redovno vodi dnevnik o pražnjenju i odvozu sadržaja separatora i IBC kontejnera, izdvojenom talogu iz istih.
- 3.17. Otpad nastao u postupku proizvodnje šibica, talog iz separatora ulja i IBC kontejnera kao i ostali opasni i neopasni otpad, ne smiju se ni privremeno odlagati na česticu «vodno dobro» odnosno u rijeku Lašvu i na njene obale.
- 3.18. Praktikovati suho čišćenje podova objekta prije pranja vodom kako bi se što više uklonile nečistoće sa radnih površina, trošilo manje vode za pranje te smanjilo zagađenje voda.
- 3.19. Da korisnik predmetnog objekta Tvornice šibica, za vrijeme trajanja ove dozvole, a nakon završetka radova predviđenih projektnom dokumentacijom, obezbjeđuje da se tehnološke otpadne vode prikupljaju u posebne IBC kontejnere (do preuzimanja od strane ovlaštene firme) a onečišćene otpadne vode sa radnih i manipulativnih površina nesmetano sakupljaju i odvoze do objekta predviđenog za tretman (separator masti i ulja), a zatim ovako tretirane vode ispuštaju u rijeku Lašvu.
- 3.20. Da se usvojenim tehničkim rješenjima iz projektno dokumentacije i realizovanim radovima poduzmu sve potrebne mjere kojima bi se obezbijedilo da prečišćene otpadne vode, prije ispuštanja u recipijent na mjernom mjestu ostanu u maksimalno dopuštenim granicama definisanim članom 14. i 15. Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20, 96/20 i 01/24).
- 3.21. U skladu sa članom 26.a Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20, 96/20 i 1/24) nosilac prava iz ove vodne dozvole dužan je izveštavati nadležnu Agenciju i Federalno ministarstvo okoliša i turizma o realizaciji planiranih aktivnosti u zadatim rokovima iz detaljnog dinamičkog plana, prvi put najkasnije do 31.12.2024. godine a drugi put najkasnije do 30.06.2025. godine na obrascu iz Priloga B navedene Uredbe.
- 3.22. Nakon izgradnje svih objekata za prikupljanje i tretman tehnoloških i drugih otpadnih voda obuhvaćenih projektnom dokumentacijom i dinamičkim planom Investitor je u obavezi da uradi Projekat izvedenog stanja odvodnje i tretmana otpadnih voda cijelog kompleksa i isti priloži prilikom podnošenja zahtjeva za izdavanje nove vodne dozvole.
- 3.23. Nakon realizacije projektno predviđenih radova na sistemu prikupljanja i tretmana tehnoloških otpadnih voda, u prisustvu nadzora radova izvršiti potpuno blindiranje (zatvaranje) postojećih ispusta otpadnih voda u rijeku Lašvu a na novom odvodnom cjevovodu, neposredno iza separatora ulja i masti a prije ispusta u recipijent, izvesti posebno reviziono okno koje će služiti kao okno za uzimanje uzoraka (monitoring okno).
- 3.24. Objekte kako postojeće, tako i one koji će se, nakon realizacije predviđenih radova, koristiti u svrhu prikupljanja, odvodnje i tretmana tehnološki i ostalih otpadnih voda nastalih u krugu pogona (kanalizaciona mreža, kanali za prihvata otpadnih voda, IBC kontejneri, kade za pranje opreme, separator ulja i masti...) potrebno je održavati i koristiti na takav način koji će obezbijediti njihovu potpunu ispravnost i funkcionalnost. O načinu i vremenu radova održavanja neophodno je voditi službenu evidenciju i arhivu.

- 3.25. Da se u skladu sa propisima iz oblasti zaštite okoliša, vrši bezbjedno i redovno skupljanje čvrstog opasnog i neopasnog otpada sa kompletnog kruga Tvornice, isti propisno skladišti do njegovog konačnog zbrinjavanja od strane ovlaštene organizacije.
- 3.26. Vlasnik odnosno korisnik objekta je dužan, putem laboratorije ovlaštene od strane Federalnog ministarstva poljoprivrede, vodoprivrede i šumarstva, vršiti redovna ispitivanja kvaliteta otpadnih voda, uzimanjem uzorka efluenta iz okna za monitoring na mjestu ispusta u skladu sa Uredbom o uslovima ispuštanja otpadnih voda u okoliš i sisteme javne kanalizacije. Učestalost i način ispitivanja vršiti u skladu sa članom 20. Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20, 96/20 i 01/24). Rezultate analiza dostaviti ovoj Agenciji.
- 3.27. Izvještaje o ispitivanju i ocjeni kvaliteta otpadnih voda može uraditi isključivo laboratorija ovlaštena od strane Federalnog ministarstva poljoprivrede, vodoprivrede i šumarstva po osnovu člana 64. stav (3) Zakona o vodama i Pravilnika o uslovima koje moraju ispunjavati referentne odnosno ovlaštene laboratorije za ispitivanje voda, sadržaj i način davanja ovlasti («Službene novine Federacije BiH», broj 14/10, 14/3, 26/14, 15/17, 23/17 i 41/20).
- 3.28. Vlasnik odnosno korisnik objekta je obavezan pridržavati se svih mjera i uslova propisanih u saglasnostima i dozvolama izdatim od strane drugih nadležnih organa, a odnose se na korištenje i zaštitu voda i nisu u suprotnosti sa uslovima iz ove vodne dozvole.
4. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada («Službene novine Federacije BiH», broj 92/07, 46/09, 79/11, 88/12 i 03/16), Prilog 1. Poglavlje V – Određivanje koeficijenata zagađenja za zagađivače voda kod kojih se ne vrše direktna mjerenja voda, tačka 21. i 23. tabele te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
5. U periodu važenja ove dozvole, vlasnik odnosno korisnik objekta Tvornice šibica je dužan provoditi sve mjere i aktivnosti propisane istom.
6. U slučaju vanrednih situacija, havarijskih onečišćenja i drugih sličnih okolnosti, čime bi bio ugrožen kvalitet podzemnih i površinskih voda, vlasnik odnosno korisnik predmetne Tvornice šibica obavezan je izvijestiti nadležne organe i izvršiti vanredna postupanja po nalogu nadležnih organa, te o vlastitom trošku uzroke štete otkloniti, a nastale štete nadoknaditi.
7. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na predmetnom objektu i radnom prostoru obuhvaćenim ovom vodnom dozvolom, korisnik zaštitnih vodnih objekata nije odgovoran za nastale štete.
8. Ukoliko radom predmetnog objekta dođe do šteta ma kakvog karaktera, korisnik vodne dozvole je dužan uzroke nastalih šteta otkloniti, a nastale štete trećim licima nadoknaditi.
9. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
10. U ovoj upravnoj stvari plaćene su sve upravne takse.
11. Ova vodna dozvola, shodno članu 26. stav 1. Uredbe o uslovima ispuštanja otpadnih voda u okoliš i sisteme javne kanalizacije se daje sa rokom važenja 30.06.2026. godine, uz uslov da se aktivnosti obuhvaćene tačkom 2. dispozitiva rješenja u cjelosti poštuju.
12. Prije isteka važnosti ove dozvole korisnik je dužan da podnese zahtjev za izdavanje nove vodne dozvole.
13. Ovo rješenje o vodnoj dozvoli može se izmijeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

Obrazloženje

Pravno lice, Tvornica šibica «DOLAC» d.o.o. Travnik, podnijelo je ovoj Agenciji dana 16.02.2024. godine zahtjev za izdavanje vodne dozvole za ispuštanje tehnoloških otpadnih voda sa lokaliteta Tvornice za proizvodnju šibica lociranog u naselju Dolac na Lašvi, na zemljištu označenom kao k.č. broj: 3169 K.O. Travnik, općina Travnik.

U provedenom postupku dostavljena je i pregledana sljedeća dokumentacija:

- Ovjerena kopija Rješenja o izmjenama podataka u sudski registar broj: 051-0-Reg-23-000555 izdatog dana 11.10.2023. godine od strane Općinskog suda u Travniku,
- Ovjerena kopija Uvjerenja o poreznoj registraciji izdatog dana 04.08.2011. godine od strane Porezne uprave – Kantonalni porezni ured Novi Travnik,
- Punomoć zastupnika podnosioca zahtjeva broj: 158/24 od 13.02.2024. godine,
- Kopija Rješenja o upotrebi i korištenju dograđenog dijela Tvornice šibica sa novom tehnološkom linijom broj: 04/VI-360-31/90 izdatog dana 28.03.1991. od strane Opštinskog sekretarijata za urbanizam, stambeno-komunalne poslove i imovinsko pravne poslove, Općina Travnik,
- Kopija Rješenja o vodnoj dozvoli broj: UP-I/25-3-40-529-4/16 izdatog dana 13.02.2017. godine od strane «Agencije za vodno područje rijeke Save» Sarajevo,
- Kopija Rješenja o vodnoj dozvoli broj: UP-I/25-3-40-002-8/19 izdatog dana 14.06.2019. godine od strane «Agencije za vodno područje rijeke Save» Sarajevo,
- Kopija Rješenja o vodnoj dozvoli broj: 06-21-8305/2021 za upotrebu i iskorištavanje izgrađenih objekata za vodosnabdijevanje prirodnom izvorskom vodom sa izvorišta «Kanare» u količini do 25 l/s izdatog dana 21.10.2021. godine od strane Ministarstva poljoprivrede, vodoprivrede i šumarstva Srednjobosanskog kantona,
- Glavni projekat instalacija vodovoda i kanalizacije za pogon za proizvodnju šibica urađen od strane «ZABREBINSPEKT» d.o.o. Mostar, juli 2018. godine,
- Kopija Izvještaja o rezultatima ispitivanja kvantitativnih karakteristika efluenta sa programom praćenja stanja voda broj: 01-2-136-XI/23 (mjerno mjesto-glavni sabirni šaht u krugu Tvornice) urađen od strane «ZABREBINSPEKT» d.o.o. Mostar, novembar 2023. godine,
- Ovjeren Dinamički plan sa aktivnostima, finansijskom procjenom i rokovima realizacije za 2024., 2025. i 2026. godinu za izgradnju i puštanje u rad sistema za prikupljanje, tretman i ispuštanje tehnoloških otpadnih voda Tvornice šibica «DOLAC» d.o.o. Travnik (dopis broj: 15/24 od 31.05.2024. godine),
- Dokaz o uplaćenju upravnoj taksi na zahtjev.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U skladu sa članom 12. stav (5) i (6) Pravilnika o sadržaju, obliku, uslovima, načinu izdavanja i čuvanja vodnih akata («Službene novine Federacije BiH», broj: 31/15, 55/19, 41/20 i 63/22) izvršen je obilazak predmetnog lokaliteta Tvornice šibica u naselju Dolac na Lašvi, općina i tom prilikom je sačinjen Zapisnik o uviđaju broj: UP-1/21-3-40-068-3/24 od 16.05.2024. godine.

Na osnovu dostavljene dokumentacije i izvršenog uviđaja na licu mjesta utvrđeno je sljedeće: Predmetna Tvornica šibica izgrađena u naselju Dolac na Lašvi, općina Travnik postoji od 1901. godine. Pogon radi po potrebi. Prema izjavi predstavnika podnosioca zahtjeva, obzirom da nema potražnje za običnim šibicama trenutno su proizvode samo kaminske šibice. Dnevni kapacitet proizvodnje je oko 20 kartona kaminske šibice a uposlena su 3 radnika.

Predmetni kompleks čine: bazen za natapanje trupaca, prostor za pripremu trupaca, guljenje furnira i siječenje drvaca, prostor za sušenje i selekciju drva, prostor za pripremu mase-kuhinja mase, pogon za proizvodnju šibica, prostor za izradu vanjskih kutijica, mini centrala, magacinski i skladišni prostor.

U sklopu Tvornice, osim pogona za proizvodnju šibica postoji i pogon za proizvodnju sokova i flaširanje izvorske vode nastao adaptiranjem prostora društvene ishrane (trenutno izdat preduzeću UTD «BEST» d.o.o. Travnik). Za aktivnost zahvatanja i distribucije prirodne izvorske vode sa izvorišta «KANARE» u količini do 25 l/s, Tvornici šibica «DOLAC» d.o.o. Travnik je dana 21.10.2021. godine izdato Rješenje o vodnoj dozvoli broj: 06-21-8305/2021 od strane Ministarstva poljoprivrede, vodoprivrede i šumarstva Srednjobosanskog kantona. Sanitarno-fekalne vode iz sanitarnog bloka za uposlenike Tvornice se ispuštaju u septičku jamu sa prelivom u rijeku Lašvu.

Tehnološke otpadne vode koje nastaju u postupku proizvodnje šibica pranjem posuda i opreme u kadama u kuhinji mase nakon spravljanja crvene mase se prikupljaju slivničkim rešetkama te kanalizacionim sistemom, preko sabirnog okna lociranog ispred objekta proizvodnog pogona, bez tretmana ispuštaju u rijeku Lašvu. U prostoru za proizvodnju šibica, prilikom pranja ploča namijenjenih za nanošenje crvene mase nastaju tehnološke otpadne vode koje se zasebnim kanalizacionim sistemom bez tretmana ispuštaju u rijeku Lašvu.

Monitoring otpadnih voda se vrši redovno na jednom mjernom mjestu-glavno sabirno okno locirano ispred proizvodnog pogona. Uvidom u dostavljeni Izvještaj o monitoringu urađen od strane «ZABREBINSPEKT» d.o.o. Mostar, novembar 2023. godine, utvrđena su prekoračenja MDK definisanih Uredbom (povećana vrijednost amonijaka, ukupnog dušika i cinka) a test toksičnosti ne zadovoljava kriterije efluenta za površinske vode.

Prema dostavljenoj projektnoj dokumentaciji (Glavni projekat instalacija vodovoda i kanalizacije za pogon za proizvodnju šibica urađen od strane «ZABREBINSPEKT» d.o.o. Mostar, juli 2018. godine) predviđeno je da se izvrši potpuno uklanjanje postojećih kada za pranje opreme u kuhinji masa te instaliranje novih kada odakle će se prikupljene tehnološke vode pumpnim sistemom ispuštati u IBC kontejnere kapaciteta 1000 (l) čije će pražnjenje vršiti ovlašteno preduzeće prema posebnom ugovoru. Za prikupljanje i tretman onečišćenih voda sa platoa objekta predviđen je zaseban kanalizacioni sistem sa slivnicima i separatorom ulja i masti te ispušt prečišćenih voda preko okna za monitoring u rijeku Lašvu.

Za predmetnu Tvornicu je u ranijem postupku, dana 14.06.2019. godine, od strane ove Agencije doneseno Rješenje o vodnoj dozvoli broj: UP-1/25-3-40-002-8/19 sa rokom važenja do 19.12.2023. godine. Navedeno Rješenje o vodnoj dozvoli izdato je u skladu sa članom 13. stav (5) Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 101/15, 1/16 i 101/18) uz uslov da se realizuju aktivnosti iz dinamičkog plana obuhvaćene tačkom 3.2. dispozitiva navedenog rješenja.

Prilikom uviđaja na terenu utvrđeno je da aktivnosti i rokovi navedeni u dinamičkom planu, a odnose na izvođenje radova po Glavnom projektu a koji su dati kroz uslove Rješenja, nisu ispunjeni.

Od ponosioca zahtjeva je u skladu sa članom 1. stav (1), (3) i (4) Uredbe o izmjenama i dopunama Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj: 26/20, 96/20 i 1/24) dopisom broj: UP-1/21-3-40-068-4/24 od 22.05.2024. godine zatraženo da dostavi detaljan dinamički plan koji treba da sadrži:

- Spisak aktivnosti i mjera sa finansijskom procjenom za ulaganje, zadanim rokovima realizacije svake pojedine aktivnosti i konačnim rokom za završetak aktivnosti na izgradnji i puštanju u rad sistema za prikupljanje, tretman i ispuštanje onečišćenih otpadnih voda na obrascu iz Priloga A ove Uredbe, razrađen po godinama i mjesecima sa konačnim rokom realizacije najkasnije do roka 30.06.2026. godine.

Dana 04.06.2024. godine dostavljen je akt broj: 15/24 od 31.05.2024. godine sa prilogom dinamičkog plana na obrascu iz Priloga A Uredbe.

U dinamičkom planu su navedene aktivnosti i rokovi sa finansijskom procjenom za ulaganje na izgradnji i puštanju u rad sistema za prikupljanje, tretman i ispuštanje tehnoloških otpadnih voda sa lokaliteta pogona za proizvodnju šibica izgrađenog u naselju Dolac na Lašvi, općina Travnik za period od juna 2024. do juna 2026. godine. Aktivnosti i rokovi iz dinamičkog plana su propisani u dispozitivu ovog Rješenja.

Na osnovu uvida u dostavljeni dinamički plan utvrđeno je sljedeće:

- Krajnji rok za realizaciju radova predviđenih dostavljenom projektnom dokumentacijom Glavni projekat instalacija vodovoda i kanalizacije za pogon za proizvodnju šibica urađen od strane «ZABREBINSPEKT» d.o.o. Mostar, juli 2018. godine) je 30.06.2026. godine.
- Rokovi za realizaciju pojedinih aktivnosti iz dostavljenog dinamičkog plana koji je sastavni dio ovog rješenja su navedeni u tački 3.3. do 3.12. dispozitiva.

Na osnovu dostavljene dokumentacije, uviđaja izvršenog na predmetnoj lokaciji i dostavljenog dinamičkog plana, u svrhu smanjenja negativnih uticaja predmetnog pogona i aktivnosti na stanje voda i vodni režim, podnosiocu zahtjeva su ovom vodom dozvolom u tački 3. dispozitiva Rješenja propisani uslovi kojih se dužan pridržavati prilikom korištenja predmetnog pogona za eksploataciju uglja u skladu sa odredbama članova 53. i 116. Zakona o vodama i članova 12. i 13. Pravilnika o sadržaju, obliku, uslovima, načinu izdavanja i čuvanja vodnih akata i odredbama člana 3. tačka s) i člana 15. Uredbe o uslovima ispuštanja otpadnih voda u okoliš i sisteme javne kanalizacije.

Tačka 4. dispozitiva Rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada («Službene novine Federacije BiH», broj 92/07, 46/09, 79/11 i 88/12) i Odlukom o visini posebnih vodnih naknada («Službene novine Federacije BiH», broj 46/07, 10/14 i 03/16).

Na osnovu provedenog postupka konstatuje se da je podnosilac zahtjeva, Tvornica šibica «DOLAC» d.o.o. Travnik ispunio minimum uslova za izdavanje vodne dozvole za ispuštanje tehnoloških otpadnih voda sa lokaliteta pogona za proizvodnju šibica izgrađenog u naselju Dolac na Lašvi, općina Travnik te je riješeno kao u dispozitivu ovog Rješenja.

U skladu sa članom 61. Zakona o vodama i odredbama Pravilnika o postupcima i mjerama u slučajevima akcidenta na vodama i obalnom vodom zemljištu («Službene novine Federacije BiH», broj 71/09 i 102/18) korisniku predmetnog pogona utvrđene su obaveze u tački 6. dispozitiva ovog Rješenja.

Uputa o pravnom lijeku:

Protiv ovog Rješenja može se uložiti žalba Federalnom ministarstvu poljoprivrede, vodoprivrede i šumarstva u roku od 15 dana od dana prijema Rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Obradivač akta:

Nermina Hodžić, dipl.ing.građ.

Za Po ovlaštenju
Rukovodilac Sektora za izdavanje
vodnih akata



Hariš Ališehović / dipl.ing.građ.

Dostaviti:

- Tvornica šibica «DOLAC» d.o.o. Travnik
- Dolac na Lašvi bb, 72270 Travnik
- ⊖ AVP Sava, ISV – Vodna knjiga
- Sektor 50
- Sektor 40 - arhiva
- Oglasna ploča - AVP Sava